

人物列傳上

沔陽志十四

春秋鬪穀

女口反

於

音烏

菟

漢書作

字子文生於邲

初若敖娶於邲生鬪伯比若敖卒從其母畜於

邲淫于邲子之女生子文邲夫人使棄諸夢中

虎乳之邲子田見之懼而歸夫人以告遂收之

楚人謂乳穀謂虎於菟故名之而字子文為楚

令尹自毀其家以紓楚國之難遂滅弦復伐隨

取成而還子玉伐陳子文以為功使為令尹叔

伯曰若國何曰吾以靖國也夫人有大功而無

志也

列傳上

一

貴仕其人能靖者與有幾楚子圍宋使子文治

兵於睽終朝而畢不戮一人子玉復治兵於蔿

終日而畢鞭七人貫三人耳國老皆賀焉賈獨

否曰子玉剛而無禮舉以敗國又何賀焉後卒

敗於晉而死初子良

子文兄

生越椒子文曰必滅

若敖氏矣殺之子良不可子文大感將死泣曰

若敖氏之鬼不其餒而臯許之役竟以子越滅

若敖氏箴尹克黃

子文孫

使齊而還王曰子文無

後何以勸善使復其所

史氏曰子文毀家紓國委政讓功子張所謂無  
喜愠色者也然明於越椒而闇於得臣故孔子  
許其忠而抑其仁與

劉焉字君郎江夏竟陵人也漢魯恭王之後裔  
章帝元和中徙封竟陵支庶家焉焉少仕州郡  
以宗室拜中郎後以師祝公喪去官居陽城山  
積學教授舉賢良方正辟司徒府歷雒陽令興  
州刺史南陽太守宗正太常焉覩靈帝政治衰  
缺王室多故乃建議言刺史太守貨賂為官割

幸四

列傳上

二

剥百姓以致離叛可選清名重臣以為牧伯鎮  
安方夏焉內求交趾牧欲避世難議未即行侍  
中廣漢董扶私謂焉曰京師將亂益州分野有  
天子氣焉聞扶言意更在益州會益州刺史郤  
儉賦歛煩擾謠言遠聞而并州殺刺史張益梁  
州殺刺史耿鄙焉謀得施出為監軍使者領益  
州牧封陽城侯當收儉治罪扶亦求為蜀郡西  
部屬國都尉及太倉令會巴西趙韙棄官俱隨  
焉是時涼州逆賊馬相趙祗等於綿竹縣自號

黃巾合聚疾疫之民一二日中得數千人先殺  
緜竹令李升吏民翕習合萬餘人便前破雒縣  
攻益州殺儉又到蜀郡犍為旬月之間破壞三  
郡相自稱天子衆以萬數州從事賈龍素領兵  
數百人在犍為東界攝斂吏民得千餘人攻相  
等數日破走州界清靜龍乃選吏卒迎焉焉徙  
治緜竹撫納離叛務行寬惠陰圖異計張魯母  
始以鬼道又有少容常時來焉家故焉遣魯為  
督義司馬住漢中斷絕谷閣殺害漢使焉上書

志十四

列傳上

三

言米賊斷道不得復通又託他州殺州中豪強  
王咸李權等十餘人以立威刑犍為太守任岐  
及賈龍由此反攻焉焉擊殺岐龍焉意漸盛造  
作乘輿車具千餘乘荆州牧劉表表上焉有似  
子夏在西河疑聖人之論時焉子範為左中郎  
將誕治書御史璋為奉車都尉皆從獻帝在長  
安惟小子別部司馬瑁素隨焉獻帝使璋曉諭  
焉焉留璋不遣時征西將軍馬騰屯郡而反焉  
及範與騰通謀引兵襲長安範謀泄奔槐里騰

敗退還涼州範應時見殺於是收誕行刑議郎  
河南龐羲與焉通家乃募將焉諸孫入蜀時焉  
被天火烧城車具蕩盡延及民家焉徙治成都  
既痛其子又感祆災興平元年癰疽發背而卒  
州大吏趙韙等貪璋温仁共上璋為益州刺史  
詔書因以為監軍使者領益州牧以韙為征東  
中郎將率眾擊劉表

璋字季玉既襲焉位而張魯稍驕恣不承順璋  
璋殺魯母及弟遂為讐敵璋累遣龐羲等攻魯

率四

列傳上

四

所破魯部曲多在巴西故以羲為巴西太守領  
兵禦魯後羲與璋情好攜隙趙韙稱兵內向眾  
散見殺皆由璋明斷少而外言入故也璋聞曹  
公征荊州已定漢中遣河內陰溥致敬於曹公  
加璋振威將軍兄瑁平寇將軍瑁狂疾物故璋  
復遣別駕從事蜀郡張肅送叟兵三百人并雜  
御物於曹公拜肅為廣漢太守璋復遣別駕張  
松詣曹公曹公時已定荊州走先主不復存錄  
松松以此怨會曹公軍不利於赤壁兼以疫死

松還疵毀曹公勸璋自絕因說璋曰劉豫州使君之肺腑可與交通璋皆然之遣法正連好先主尋又令正及孟達送兵數千助先主守禦正遂還後松復說璋曰今州中諸將龐羲李異等皆恃功驕豪欲有外意不得豫州則敵攻其外民攻其內必敗之道也璋又從之遣法正請先主璋主簿黃權陳其利害從事廣漢王累自倒縣於州門以諫璋一無所納勅在所供奉先主先主入境如歸先主至江州北由墊江水詣涪

率四

列傳上

五

去成都三千六十里是歲建安十六年也璋率步騎三萬餘人車乘帳幔精光曜日往就與會先主所將將士更相之適歡飲百餘日璋資給先主使討張魯然後分別明年先主至葭萌還兵南向所在皆克十九年進圍成都數十日城中尚有精兵三萬人穀帛支二年吏民咸欲死戰璋言父子在州二十餘年無恩德以加百姓攻戰二年肌膏草野者以璋故也何心能安遂開城出降群下莫不流涕先主遷璋于南郡公

安盡歸其財物故佩振威將軍印綬孫權殺關羽取荊州以璋為益州牧駐秭歸璋卒南中豪率雍闓據益郡反附於吳權復以璋子闡為益州刺史處交益界首丞相諸葛亮平南土闡還吳為御史中丞初璋長子循妻龐羲女也先主定蜀羲為左將軍司馬璋時從羲啓留循先主以為奉車中郎將是以璋二子之後分在吳蜀晉陳壽曰昔魏豹聞許負之言則納薄姬於室劉歆見圖讖之文則名字改易終於不免其身

率四

列傳上

六

而慶鍾二主此則神明不可虛要天命不可妄異必然之驗也而劉焉聞董扶之辭則心存益土聽相者之言則求婚吳氏遽造輿服圖竊神器其惑甚矣璋才非人雄而據土亂世負乘致寇自然之理其見奪取非不幸也

史氏曰焉求牧交本以避世也一聞董扶之言輒萌異圖何其戾也扶素負重名稱為儒宗至為焉計但以望氣為言其視隆中之說遠矣璋反復曹劉依違指使成都之圍兵強粟富而不

能一戰史稱璋闇弱信哉

宋張興世字文德竟陵竟陵人也本單名世太宗益為興世少時家貧南郡宗珍之為竟陵郡興世依之為客竟陵舊置軍府以補參軍督護不就白衣隨王玄暮伐蠻每戰輒有禽獲玄暮舊部曲諸將不及也甚竒之興世還都白太祖稱其膽力後隨世祖鎮尋陽以補南中參軍督護討元凶隸柳元景為前鋒事定轉員外將軍從隊南郡王義宣反又隨玄暮出梁山有

志十四

列傳上

七

戰功除建平王宏中軍行參軍領長刀又隸西平王子尚為直衛坐從子尚入臺棄仗游走下獄免官復以白衣充直衛大明末除員外散騎侍郎仍除宣威將軍隨郡太守未行太宗即位四方反叛進興世號龍驤將軍領水軍距南賊於赭圻築二城於湖口偽龍驤將軍陳慶領舸於前為游軍興世率龍驤將軍佼長生董凱之攻克二城因擊慶慶戰大敗投水死者數千人時臺軍據赭圻南賊屯雒尾相持久不決興世

建議曰賊據上流兵疆地勝我今雖相持有餘而制敵不足今若以兵數千潛出其上因險自固隨宜斷截使其首尾周遑進遏疑沮中流一稷糧運自艱制賊之奇莫過於此沈攸之吳喜並贊其計時豫州刺史殷琰之據壽陽同逆為劉劬所攻南賊遣龐孟虬率軍助琰劉劬遣信求援甚急建安王休仁欲遣興世救之問沈攸之攸之曰孟虬蟻寇必無能為遣別將馬步數千足以相制若有意外且以江西餌之上流若

幸四

列傳

八

據不憂不殄興世之行是安危大機必不可輟乃遣段佛榮等援劬興世欲率所領直取大雪而軍旅未集不足分張會薛索兒平定太宗使張末以步騎五千留戍盱眙餘衆二萬人悉遣南討山陽又尋平徵阮佃夫所領諸軍悉還南伐衆軍大集乃分戰士七千配興世興世乃令輕舸泝流而上旋復回還一二日中輒復如此使賊不為之備劉胡聞興世欲上笑之曰我尚不敢越彼下取揚州張興世何物人欲輕據我



上興世謂攸之等曰上流唯有錢谿可據地旣險要江又甚狹去大衆不遠應赴無難江有洄船下必來泊岸有橫浦可以藏船舸二三為宜乃夜渡湖口至散頭因復回下疑之其夜四更值風仍舉颿直前賊亦遣胡靈秀諸軍於東岸相翼而上興世夕住景江浦宿賊亦不進夜潛遣黃道標領七十舸徑據錢谿營立城柴明旦興世與軍齊集停一宿劉胡自領水步二十六軍平旦來攻將士欲迎擊之興世禁曰賊來

志四

列傳上

九

尚遠而氣盛

驟驟旣力盡盛亦易衰此曹劇

之所以破齊也令將士不得妄動治城如故俄而賊來轉近舫入洄洑興世乃命壽寂之任農夫率壯士數百擊之衆軍相繼進胡於是敗走斬級數百投水者甚衆胡收軍而下時興世城壘未固司徒建安王休仁慮賊并力更攻錢谿欲分其形勢命沈攸之吳喜交長生劉靈遺等以皮艦二十攻賊濃湖苦戰連日斬獲千數是日劉胡果率衆軍欲更攻興世未至錢谿數十

里袁顛以濃湖之急遽追之錢溪城柴由此得立賊連戰轉敗興世又過其糧道尋陽遣運至南陵不敢下賊衆漸饑劉胡乃遣顛安北府司馬僞右軍沈仲玉領千人步取南陵迎接糧運仲玉至南陵領米三十萬斛錢布數十舫豎榜為城規欲突過行至貴口不敢進遣間信報胡令遣重軍援接興世壽寂之任農夫李安民等三千人至貴口擊之與仲玉相值交戰盡日仲玉走還顛營悉虜其資實賊衆大敗震胡棄軍

志十四

列傳

十

遁走顛仍亦奔散興世率軍追討與吳喜共平江陵遷左軍將軍尋為督豫司二州南豫州郡諸軍事封作唐縣侯食邑千戶徵為游擊將軍海道北伐假輔國將軍加節置佐無功而還四年遷太子右衛率又以本官領驍騎將軍與左衛將軍沈攸之參貳置五年轉左衛將軍六年中領軍劉劬當鎮廣陵興世權兼領軍泰豫元年為持節督雍梁南北秦郢州之竟陵隨二郡諸軍事冠軍將軍雍州刺史尋加寧蠻校尉

桂陽王休範反興世遣軍赴朝廷未發而事平  
進號征虜將軍廢帝元徽三年徵為通直散騎  
常侍左衛將軍五年以疾病徙光祿大夫常侍  
如故順帝昇明二年卒時年五十九追贈本官  
興世居臨沔水沔水自襄陽以下至于九江二  
千里中先無洲嶼興世初生當其門前水中一  
旦忽生洲年年漸大及至興世為方伯而洲上  
遂十餘頃父仲子由興世致位給事興世欲將  
往襄陽愛戀鄉里不肯去嘗謂興世我雖田舍

率四

列傳上

十一

老公樂聞鼓角可送一部行田時吹之興世素  
恭謹畏法憲譬之曰此是太子鼓角非田舍老  
公所吹興世欲拜墓仲子謂曰汝衛從太多先  
人必當驚怖興世減撤而後行興世子欣業當  
嗣封會稽受禪國除

梁沈約曰兵固詭道勝在用奇當二帝爭雄天  
人之分未決南北連兵相阨而不得進者半歲  
矣蓋乃趙壁拔幟之機官度潛師之日至於鵠  
浦投戈實興世用奇力也建旆垂組豈徒然哉

史氏曰鶴頭之戰畫勝箚摧彊鋒固作唐之奇也然久秉軍旅之寄歷事猜昏之主能以功名自終且復慶施厥嗣洲嶼之生豈真有意哉黃回竟陵郡軍人也出身充郡府雜役稍至傳教臧質爲郡轉齋帥及去職將回自隨質爲繼州回復爲齋帥質討元凶回隨從有功免軍戶質在江州擢領白直隊主隨質於梁山敗走向豫章爲臺軍主謝承祖所錄付江州作部遇赦得回因下都於宣陽門與人相打詐稱江夏

志十四

列傳上

十二

王義恭馬客鞭二百付右尚方會中書舍人戴明寶被繫差回爲戶伯性便辟勤緊奉事明寶竭盡心力明寶尋得原赦委任如初啓免回以領隨身隊統知宅及江西墅事性有巧藝觸類多能明寶甚寵任之回拳捷果勁勇力兼人在江西與諸楚子相結屢爲劫盜會太宗初即位四方反叛明寶啓太宗使回募江西楚人得快射手八百假回寧朔將軍軍主隸劉勔西討於死虎破杜叔寶軍除山陽王休祐驃騎行參軍

龍驤將軍攻合肥破之累遷至將校以功封葛陽縣男食邑二百戶後廢帝元徽初桂陽王休範爲逆回以屯騎校尉領軍隸蕭道成於新亭創詐降計事在休範傳回見休範可乘謂張敬兒曰卿可取之我誓不殺諸王敬兒即日斬休範事平轉回驍騎將軍加輔師將軍進爵爲侯改封聞喜縣增邑千戶四年遷冠軍將軍南琅邪濟陽二郡太守建平王景素據京口反遣回與李安民等討之又命段佛榮爲都統回先與

志十四

列傳

十三

景素通謀蕭道成知回有異志故使安民佛榮偕行回私戒士卒逢京口兵勿得戰然迫於佛榮且見京口軍弱遂不發及拔京口回軍先入自謂誓不殺諸王又以景素讓張倪奴斬之事平道成釋回不問增邑五百戶進號征虜將軍加散騎常侍太守如故明年遷右衛將軍常侍如故沈攸之反以回爲使持節督郢州司州之義陽諸軍事平西將軍郢州刺史給鼓吹一部率衆出新亭爲前鋒未發而袁粲據石頭謀誅

道成回與新亭諸將帥任侯伯彭文之王宜興  
孫曇瓘等謀應粲粲事發侯伯等並乘船赴石  
頭唯曇瓘先至得入侯伯等至而粲已平回本  
期詰旦率所領從御道直向臺門攻道成於朝  
堂事既不果道成撫之如舊回與宜興素不協  
慮或反告因其不從處分斬之回進軍未至郢  
州而沈攸之敗走回至鎮進號鎮西將軍改督  
為都督回不樂停郢州固求南兖遂率部曲輒  
還改封安陸郡公增邑二千戶并前三千七百

志十四

列傳上

十四

戶改都督南兖徐兖青冀五州諸軍事鎮北將  
軍南兖州刺史加散騎常侍持節如故道成以  
回終為禍亂乃上表曰黃回出自厮伍本無信  
行仰值泰始謬被驅馳階藉風雲累叨顯伍及  
沈攸之作逆事切我機臣聞於知人冀其搏噬  
遣統前鋒竟不接刃軍至郢城乘威迫脅陵掠  
所加必先尊貴武陵王馬器服咸被虜奪城內  
文武剝剔靡遺及至還都縱恣彌甚先朝御服  
猶有二輿弓劍遺思尚在軍府回遂啓求以擬

私用僭侮無狀罔顧天極又廣納逋亡多受劫盜親信此等竝爲爪牙觀其凶狡憂在不測惡積臯著非可含忍應加剿除以明國憲尋其釁狀寔宐極法但嘗經將帥微有塵露臯疑從輕事炳前策請在降減特原餘嗣臣過荷隆寄言必罄誠謹陳管穴式遵弘典伏願聖明特垂允鑒臣思不出位誠昧甄錄追言既往伏增慙慙詔曰黃回擢自凡豎夙負疵釁貫以憲綱收其搏噬雖勤效累箸而屠

新亭背叛投拜

志十四

列傳上

十五

寇場異規旣扇廟律幾

得張敬兒提戈直

奮元惡受戮及景素結逆履霜歲久乃密通音譯潛送器械氛沴克霽狡謀方顯每存容掩冀能悛革故襲茅升爵均榮勲寵凶詖有本險慝滋深構誘敬兒志相攻陷悖圖未遂狼戾彌甚近軍次郢鎮劫逼府主兼挾私計多所徵索主局咨疑便加捶楚專肆暴慢罔顧彝則膺牧西蕃徽音惟厚曾不知感猶懷忿怨李安民述任河濟星管未周貪據檢要苦祈回奪黷謁弗已

叨侈無度遂請求御輿僭擬私飾又招萃賊黨  
初不啓聞傷風蠹化莫此之甚宜明繩裁肅正  
刑書便收付廷尉依法窮治回時有部曲數千  
人道成欲收回恐其為亂乃召回入東府至停  
外齋使桓康將數十人數其罪而殺之時年五  
十二子僧念尚書左民郎竟陵相未發從誅回  
既貴祇事戴明寶甚謹言必自名每至明寶所  
屏人獨語未嘗敢坐躬至帳下及入內料檢有  
無隨之

以此為常

志四

列傳

十六

史氏曰回曳尾溷濁附翼風雲遂能握符建牙  
提師千里亦一時之遭也然質性凡鄙不學無  
術方在郢州固求南充釁跡既露帥衆輒還何  
異送死哉京口石頭之舉回皆與謀碩卒首鼠  
不發坐觀敗覆回雖趨捷豈非匹夫之勇耶使  
回挺身唱義勒師及戈事即不成不失與諸袁  
同遊也而迺俛首外齋父子駢戮悲夫

人物列傳上